



Comunu de Donori

Minera de S'Ortu Bèciu



Posta in sa localidadi omònima, sa Minera in is primus annus 50 iat tentu unu arrollu de importu mannu po s'èconomia de su logu, fendi traballai a unus cincuenta obràrgius chi iat assegurau una produssidura ònnia annu de unus 500 tonnelladas de materiali de prumu.

Sa sotziedadi Monteponi iat incarrerau su traballu de cussu sterrimentu a s'acabu de s'Otuxentus cuncordendi su traballu de bogadura e fraighendi livellus meda de gallerias, cun una diferèntzia de artària de unus 200 metrus. Paris cun is impiantus alliongiaus a strintu a su traballu de miniera – unu forredu de fraili (in sa galleria de imbasciamentu), unu magasinu, una centrali elètrica e una laveria po sa galligiadura de su minerali – iant pesau su palàtziu de sa diretzioni e is domus de is minadoris.

Su complessu mineràriu e is manufatus edilìtzius s'amostant ancora beni cuncordaus. Sa Minera, pustis de sa fàsia de atividadi màssima, in su tempus de is annus Cincuenta, dd'ant abandonada po una parti sceti ; unus cantus fràigus funt ancora abitaus, cummenti cussu de sa diretzioni, o ant arriciu traballus de mantengu e de arrecasciadura. Is cunditziunis bonas de su complessu mineràriu, mancai immoi no fait a ddu visitai, funt possibilis puru poita ca ddoi est unu presìdiu de castiamentu e de amparu de cussus logus.